

GENESIS 1

Mong erer Got-ohwe maa manhetip-ohwe meng-oh.

Got-oh kapenaat maa patarpatipoh awtaano mongo tomo mohri patarpatipmur. Patarpapaat naa-mamenmat paatan kwitem-dus patesuhmur. Kwitem-dus paatan Got ohwe daa-oh tom-hru-tai suso apiro ham patesuhmur.

Gahan tipan-oh mong-moh kwitem-dus paatan Got-oh mong-moh haa-daa-hatinoh ritporhan mong amaa daa-hatipoh. Daa-hatporhan waadaioh yah-hah amaa hatipoh. Yah-hahhan kwitem-dus orhwe-dai mong-daa orhwe-dai amaa matipoh. Idaipaat mong-daanong-oh mong-daamur amaa potipoh. Kwitemnong-oh kwit-mutuhmur amaa potipoh. Oh tipan-ohwe meng-oh.

Gahan tipnerip-oh Got-oh tom-oh harep-orhwe-hah tai-orhwe-hah haa-hatinoh ritporhan arpin tom-oh tai-orhwe-hah harep-orhwe-hah amaa hatipoh. Hatporhan mutuhnong-oh boktahmur amaa potipoh. Oh tipnerip-ohwe meng-oh

Gahan bimrip-oh Got-oh harep-ohwe tom-oh haa-taptai-hatinoh. Mong-oh haa-pitap-hatinoh ritporhan arpin tom-oh tap-tai-hah mong-oh pitap-hah amaa hatipoh. Ihtiporhan mong maa pitap-hahnong mongmur amaa potipoh. Porpaat

Genesis 1

tom maa tap tai-hahnong-oh tom hrumer amaa potipoh. Porpaat waadaiohmur tomsi mongsi amaa yah-hayaa hatpaaoh. Yah-hatperhan oh iraato unuho erer-oh mong-tai haa-maronoh ritporhan arpin iraato unuho erer-oh mong-tai amaa marhupaaoh. Marapti gwe timapti gwe-oh amaa kaakdah taarhot wanhupaaoh. Wandasaam amaa-ohwe iraat-gwehe orhor mara amaa-ohwe unuh-gwehe amaa-unuh-orhor mara amaa hatpaaoh. Hatporhan Got-oh waadaiohmur amaa yah-hayaa hatpaaoh. Oh bimrip-ohwe meng-oh.

Gahan hatrip-oh Got-oh ataano hayopo merumo oh haa-tarpatingwe ritporhan arpin amaa tarpatpaaoh. Tarpatperhan oh ataan-oh mong-daa haas-hatin-haan amaa itipoh. Hayopo merumo ihir kwitem haas-hatin-haan amaa itipoh. Itipohoh ihan mong-oh haassi paatmur. Ihamaa Got-oh mong kom-taansi bos-taansi matipmur. Oh hatrip-ohwe meng-oh.

Gahan hathatoh Got-oh aningo tom-hru-tem maa paat-haano erer-oh haa-tarpatingwe daa-hatporhan amaa tarpatpaaoh. Tarpatperhan nero erer-oh haa-tarpatingwe daa-hamaa mongsi amaa manhetipoh. Ihtipohoh nero erer-oh amaa tarpatpaaoh. Tarpatperhan waadaiohmur amaa yah-hayaa hatpaaoh. Yah-hayaahan baap taman-hemaa aning-ohwe baap-ohwe aning baap-orhor hah ner-ohwe baap-ohwe ner-baap-orhor hah amaa-baap-ohwe baaphe amaa-baap-orhor hah amaa-

Genesis 1

hatpaaoh. Hapti amaa aartahat hwipaaoh. Oh hathat-ohwe meng-oh.

Gahan dop-oh Got-oh miaano imaaho ningo hasiaapo erer-oh haa-tarpatingwe daa-hamaa amaa manhetipoh. Manhetporhan imaah-ohwe baaphe imaah-baap-orhor hah ning-ohwe baaphe ning-baap-orhor hah hasiaap-baaphe hasiaap-baap-orhor hah amaa hatpaaoh. Hapti amaa aartahat hwipaaoh. Aartahat saperhan Got-oh waadaioh amaa yah-hayaa hatpaaoh. Yah-hayaahan imaaho amaa-erer-ihirnong Unuho erer-moh gure dapti-haanmur. Moh dinmur amaa potipoh. Potporhan ihir arpin amaa dipaaoh.

Haanip Got-oh maa manhetip-ohwe meng-oh.

Gahan Got-oh Noh gin haanip manhetporaa daa-hamaa haanip amaa manhetipoh. Kuusi haansi orhor-hatin amaa manhetipoh.

GENESIS 2

Haanip maa manhetipoh mong-oh daraa mong-simur amaa manhetipoh. Manhemaa Got-oh Oh haa-daasi hatinoh-rim orhwe nah-oh ohwe rum-tem-kaatnong amaa matipoh. Matporhan oh amaa daasi hatipoh. Daasi hatporhan Got-oh ohwe win-oh Atdaammur amaa potipoh. Pora den-ru isip-tit amaa aagonotipoh. Aagonomaa ohnong pisasaa

den-ru-dahnong amaa mat madaatipoh. Amaa-ru
 mutuh-oh tom-tit amaa aprisuhoh. Tom amaa
 aprisuh-ohwe tom-kutnong-oh mong Itdaandapat
 amaa aprisuhoh. Ihtiporhan iraathe tit-iraat-
 ohwe gwe-oh dayaahanoh naa-haputin-ohwe iraat-
 gwesi amaa patesuhoh. Tit-iraat-ohwe gwe-oh
 dayaahanoh erer-oh am-hatin-ohwe iraat-gwesi
 amaa patesuhoh. Ihamaa Got-oh Atdaam-ohnong
 mat madaapaat Go den-ru-moh unuh hatinmur.
 Unuh hamaa iraat-gwe-moh gonsi kapom dinmur.
 Kapom dinmuraa; mamaa-erer-oh am-hatin-ohwe
 iraat-gwe-moh kapom dipraa. Kapom dehanoh er-
 daasi yah-daasi am-hatiprohohoh ihan kapom
 dipraa. Kapom dehanoh haputiprohoh ihan madaa-
 tinmur amaa gipotipoh. Giporaa ningo saamino
 nero mongsi maa manhetip-erer-oh Atdaam-ohwe
 paat-tainong amaa papdapoh. Ohwe paat-tainong
 popriporhan oh amaa nitaat-win aatipoh. Nitaat-
 win aatporhan gahan Got-oh Atdaam-oh orhwaap
 paat-moh. Orhwe er-hat paat-moh. Ihan noh
 kuu-tit aamanhetpor. Aamanherit ihit-gaamin
 yot-hat haa-patengwe amaa gidaa-hatipoh. Gidaa-
 hapaat Atdaam-ohnong kin amaa ruumsaan patimdip-
 oh. Patimapaat gohonbi-tam-tit amaa aadatipoh.
 Aadarpaat wataah-oh it amaa aayohor-matipoh.
 Aayohor-daipaat kuu-uhong amaa gohonbi-tam-ohsi
 amaa manhetipoh. Manhepaat uhnong ohwe duup
 amaa madaatipoh. Madaatporhan oh masas

Genesis 3

waamaraa Gin norhwe wataah-inaa hatin paatheo. Got-oh norhwe gohonbi-tam-moh daraa manhe-moh ihan kuumur amaa ritipoh. Ihtipohoh ihan haan-ihir patem kuu daripti supsi itapsi madaamaa itaait gaaminnong daa-gwasaaripti. Titinaawi hat patimur. Ihtiperhan Got-oh Gut brer manhemaa haanip haa-aartahatingwe. Aartahatperhan gure harep-oh erer-moh sa patepri amaa potipoh. Poraa waadaioh erer maa manhetip-oh amaa yah-hayaah hatpaaoh. Yah-hayaahan amaa mamen-matipoh. Oh dop-ohwe meng-oh.

Gahan bes-oh amaa tupetipoh. Tuperpaat amaa giritipoh. Bes orhwe-gonmur amaa ritipoh Ritporhan ihit hamen tibas rih tibas pateshe-orhor kas tibas amaa patesheoh.

GENESIS 3

Haanip er-daa tarpatip-ohwe meng-oh.

Patin gahan hasiaap-tit amaa apdapoh. Hasiaap daa-trunsi-hasiaap-tit amaa apdapoh. Aprisaa kuu-uhnong Got-oh iraat-gwe-moh gonsi dipri napangwerdaa gipor amaa dahaamtipoh. Gipor dahaamtiporhan uh Eis iraat-qwe-gonsi kapom daptimur. Mutuh-mohwi Got-oh iraat-gwe mutuh-moh kapom dipri. Damo marimo hayaahan haputiprohehoh ihan kapom dipri naporpaatmur amaa gipotipoh. Gipotporhan hasiaap-oh Eis

Genesis 3

naa-haputiprohemur. Moh dayaahanoh er-daasi yah-daasi am-hamaa orhor-hatin hatiprohemur. Moh Got-oh am-hat paatmur amaa gipotipoh. Gipotporhan uh waadaipaat Noh diprohningo daa-hamaa iraat-gwe-awaam amaa kapom dipoh. Kat-oh amaa dipohaa; kat-oh imaapnong apriporhan imaap-oh amaa dipoh. Diperhan ihit daasinap amaa hatpaaoh. Daasinap hapti waatahayaaoohmur hamen tibas rih tibas patin ihit iraat-rin-oh daripti wih-maraa yemsaper mat amaa aanpaaoh. Aaripti patin kwihan Got-oh ru-tai amaa apdapoh. Apris hahhan Atdaam-ihit-gaamin amraamaa haa-dus amaa tremdipaaoh. Treman patin Got-oh Gut-gaamin de-tai patio poraa amaa uyaatipoh. Uyaatporhan imaap-oh Go apris hahhan noh be paatohoh kas-ham tremamur amaa gipotipoh. Gipotporhan Got-oh Nih gonong be paatmur naporhe. Go iraat-gwe awaam-moh kapom dedaa amaa gipotipoh. Gipotporhan Atdaam-oh Gorhwe naamdaatir-kuu mauh nohnong iraat-gwe kapom naapriporhan noh demur amaa gipotipoh. Gipotporhan ohuhnong Go kin-ham ihah amaa gipotipoh. Gipotporhan uh Noh hasiaap-oh daasuh-nahatporhan kapom demur amaa gipotipoh. Gipotporhan Got-oh hasiaap-ohnong Go daasuh-daiohoh go bos hamnong ham tarot sasipraamur. Gwe baap-oh kuu-uhwe brer-ire ye-haan hatiprimur. Hamaa uhwe puh-ohnong tongwu-kaa-moh gaadut potporhan ohdapat

Genesis 3

it gwe kaaknonghe oh tonggwaanet napotipraamur amaa gipotipoh. Giporaa kuu-uhnong Go ihahohoh ihan brerhe go batbet ruumsaan-tit hamaa brer itipraamur. Sarpaat it imaan-ohwe daanongwi hatipraamur. Hamaa ohwe harep patepraamur amaa gipotipoh. Giporaa Atdaam-ohnong Go inan uhwe meng amraam de-ohraa noh gwe rang-tai unuh iraat-bek pamrapraamur. Pamraporhan go ruum-saan tamrindipraamur. Ruumsaan tamripaatdapat-orhor haputipraamur. Haputporhan noh gonong mongsi namanhetipohoh ihan go it mong hatipraamur amaa gipotipoh. Giporaa Got-oh ning-wataah amaa aaemtipoh. Aaemaraa aapriporhan ihit amaa aanpaaoh. Aaraa Atdaam-oh Kuu-moh haanip-ire sup titwi rimaa gahan win-oh Ipmur amaa potipoh. Ipmur poraa ihit-gaamin er-daasi yah-daasi amaa am-hatpaaoh. Am-hatperhan gahan Got-oh ihit naa-haputin-ohwe iraat-gwe-moh kapom damaa aimat patepri-rim waan-mongnong amaa darhetipoh. Darheraa bior haassi-ohsi Got-orhorsi maa pati-haan-ihirsi madaap-pe amaa itipoh. Ihit it aprisaa iraat-gwe kapot dipri-rim amaa itipoh. Itporhan ihit susaa waan-mong amaa rang daimo patesheoh.

Published 1977

Printed by the S.I.L. Printing Department
Ukarumpa, E.H.P., Papua New Guinea

National Library of Australia
Card Number and ISBN 0 86893 052 0